



***Univerzitet u Sarajevu  
Upravni odbor***

***PRAVILNIK***

***O UVJETIMA, NAČINU I POSTUPKU ZA DODJELU  
SREDSTAVA STUDENTIMA UNIVERZITETA U SARAJEVU  
IZ FONDA ZA STIMULACIJU NAUČNO-ISTRAŽIVAČKOG,  
STRUČNOG I UMJETNIČKOG RADA „ACC. EDHEM ČAMO“***

***Oktober, 2007. godine***

Na osnovu člana 27. Zakona o ustanovama („Službene novine RBiH“, broj: 6/92, 8/93 i 13/94) i člana 14., 153. i 162. Pravila Univerziteta u Sarajevu, Upravni odbor Univerziteta u Sarajevu je, na 17. sjednici održanoj 03.10.2007. godine, d o n i o

**P R A V I L N I K**  
**O UVJETIMA, NAČINU I POSTUPKU ZA DODJELU SREDSTAVA STUDENTIMA**  
**UNIVERZITETA U SARAJEVU IZ FONDA ZA STIMULACIJU NAUČNO-**  
**ISTRAŽIVAČKOG, STRUČNOG I UMJETNIČKOG RADA „ACC. EDHEM ČAMO“**

**Član 1.**

U cilju podsticanja naučno-istraživačkog, stručnog i umjetničkog rada, te promocije i potpore studentskom stvaralaštvu utvrđuje se fond kojim će se nagradjivati najbolji studentski radovi naučnog ili stručnog sadržaja, odnosno umjetnička ostvarenja.

Ovim se pravilnikom uređuju uvjeti i postupci za ostvarivanje prava na materijalnu potporu koju dodjeljuje Fond „Acc. Edhem Čamo“ (u daljem tekstu: Fond) u cilju osvarivanja svoje svrhe.

**Član 2.**

Novčana sredstva iz Fonda mogu se dodijeliti isključivo za ostvarivanje svrhe Fonda kako slijedi:

- Novčana pomoć za potporu studentskim naučno-istraživačkim radovima i projektima, odnosno umjetničkim ostvarenjima i programima na Univerzitetu i u cijeloj akademskoj zajednici;
- Novčana pomoć za najtalentovanije studente Univerziteta.

**Član 3.**

Pravo učešća za dodjelu nagrade imaju svi redovni i vanredni studenti dodiplomskog studija Univerziteta u Sarajevu, kao i studenti postdiplomskog studija Univerziteta u Sarajevu, uz obavezu da ispunjavaju sve uslove iz konkursa.

**Član 4 .**

Studenti-aplikanti na konkurs za dodjelu nagrade iz sredstava Fonda mogu prijaviti rad naučnog ili stručnog sadržaja odnosno umjetničko ostvarenje jednog ili više autora.

Za nagradu nije moguće prijaviti diplomski rad, ali se može prijaviti rad koji je u vezi sa temom diplomskog rada.

Istom studentu nagrada se može, u pravilu, dodijeliti samo jednom.

**Član 5.**

Studenti koji se prijavljuju za nagradu iz Fonda aplikacije predaju na svojim matičnim visokoškolskim ustanovama.

Nastavno-naučno/nastavno-umjetničko vijeće visokoškolske ustanove je dužno da sačini konačni prijedlog liste kandidata za nagradu i istu dostavi na određenu grupaciju Univerziteta.

Grupacija dostavlja rektoru konačnu listu prijedloga redosljeda kandidata s obrazloženjem u roku ne dužem od 60 dana od dana zaključenja konkursa.

Dodjela nagrada iz sredstava Fonda može se odobriti samo ako potencijalni korisnici sredstava svojim prijedlogom, projektom, umjetničkim ostvarenjem i procjenom zadovolje opšte i posebne uslove tražene u zahtjevu za dodjelu sredstava.

Prilikom procjene, koju vrši odbor Fonda koji je odredio rektor, a kojim i predsjedava poštovat će slijedeće opšte uslove:

- Kvalitet i značaj rada, projekta, umjetničkog ostvarenja ili programa u unaprijeđenju i razumjevanju područja istraživanja;
- Kvalitet i značaj rada, projekta, umjetničkog ostvarenja ili programa za unaprijeđenje naučno-istraživačkog umjetničkog i obrazovnog rada na Univerzitetu u Sarajevu.

### **Član 6.**

Prijave za učešće u konkursu moraju obavezno sadržavati slijedeće:

- Pismeno obrazloženje zahtjeva za dodjelom sredstava, te podatke o postignutim rezultatima studenta;
- Službenu potvrdu o položenim ispitima na dodiplomskom studiju;
- Dvije preporuke nastavnika u nastavno-naučnom/umjetničkom zvanju docenta i višem, koji poznaju rad studenta;
- Popis naučnih radova i najznačajnije radove iz naučno-istraživačkog, stručnog, umjetničkog rada studenta;
- Biografiju.

### **Član 7.**

Novčana sredstva Fonda se dodjeljuju putem javnog konkursa. Konkurs se raspisuje na osnovu odluke Senata, u pravilu jednom godišnje.

Tekst konkursa za dodjelu sredstava mora obavezno sadržavati slijedeće podatke:

- Namjena za koju se dodjeljuju sredstva;
- Iznos sredstava koji se dodjeljuje;
- Vremenski rok na koji se dodjeljuju sredstva;
- Godišnje programske prioritete;
- Rok za podnošenje prijava;
- Način i rok saopštavanja odabira;
- Broj nagrada;
- Vrsta i namjena nagrada;
- Opšti i posebni kriteriji za dodjelu nagrade.

### **Član 8.**

Konkurs se objavljuje na web. stranici Univerziteta, a obavezno se objavljuje i u jednom od dnevnih glasila sa područja BiH.

### **Član 9.**

Odbor Fonda čine:

- Predsjednik Upravnog odbora Univerziteta
- Rektor
- Prorektori
- Predsjednici grupacija
- Generalni sekretar.

Nakon isteka rokova za podnošenje prijava Odbor vrši ocjenu prispijelih prijava i utvrđuje konačnu listu sa kandidatima i iznosima novčane nagrade.

U svom radu Odbor može, vezano za naučno-istraživačku ili umjetničku oblast iz koje zahtjev dolazi, tražiti mišljenje grupacije o istoj.

Izuzetno, Odbor može tražiti i mišljenje recenzenata, najviše njih dva, iz redova osoba u naučno-nastavnom/umjetničko-nastavnom u zvanju docenta i višem, priznatih stručnjaka iz područja za koja se dodjeljuju sredstva.

Recenzije se pišu na recenzentskim obrascima /Prilog 1./

Radom odbora predsjedava Rektor.

O toku sjednice vodi se zapisnik.

Procjena Odbora se smatra valjanom ako se o njoj javnim ili tajnim glasanjem izjasnila natpolovična većina svih članova Odbora.

#### **Član 10.**

Rektor donosi odluku, na osnovu prijedloga Odbora, u roku ne dužem od 60 dana od dana zaključenja konkursa.

Odluka rektora je konačna i obavezujuća.

#### **Član 11.**

Lista dobitnika nagrade iz sredstava Fonda objavljuje se na web. stranici Univerziteta, oglasnoj ploči Univerziteta i u jednom dnevnom glasilu sa teritorije BiH.

#### **Član 12.**

Nagrada koja se dodjeljuje sastoji se od povelje i novčanog iznosa utvrđenog u budžetu Univerziteta u Sarajevu.

Sadržaj i oblik povelje utvrđuje rektor.

Svakome od studenata autora nagrađenog timskog rada dodjeljuje se povelja, a novčani iznos nagrade raspoređuje se na jednake dijelove svim članovima tima.

Rektor svake akademske godine može dodijeliti jednu ili više posebnih nagrada studentu odnosno skupini studenata za izuzetan uspjeh u predstavljanju Univerziteta, javnom nastupu ili djelovanju (dramska, likovna, glazbena, sportska skupina, udruženja studenata i sl.).

Posebna nagrada dodjeljuje se u obliku posebne povelje čiji izgled i sadržaj određuje rektor.

Kada se posebna nagrada dodjeljuje skupini studenata, svakom članu skupine se uručuje potvrda o dodijeljenoj nagradi.

#### **Član 13.**

Sa dobitnikom/icima nagrade iz sredstava Fonda, rektor Univerziteta zaključuje ugovor o dodjeli sredstava, na obrascu ugovora čiji je sadržaj utvrđen ovim Pravilnikom.

#### **Član 14.**

Nagrade uručuje rektor Univerziteta na prigodnoj svečanosti. Uručivanju nagrade prisustvuju nagrađeni studenti i senatori Univerziteta u Sarajevu, kao i uzvanici po odluci rektora.

U slučaju spriječenosti ili odsutnosti nagrada se može uručiti i opunomoćeniku nagrađenog.

#### **Član 15.**

Ugovor iz prethodnog člana ovog Pravilnika se sklapa u pisanom obliku i obavezno sadrži:

- Osnovne podatke o ugovornim stranama;
- Iznos dodjeljenih sredstava i način isplate;
- Rok na koji se sredstva dodjeljuju;
- Predmet ugovora;
- Obaveza izvještavanja ugovorne strane o realizaciji predmeta ugovora;
- Odredbe o povratu sredstava u slučaju nepridržavanja uslova iz ovog Pravilnika i ugovora;

- Mjesto i datum sklapanja ugovora i potpise ugovornih strana.

#### **Član 16.**

U slučaju da neko od pitanja nije riješeno ovim Pravilnikom na odgovarajući način imaju se primjeniti odredbe Pravila Univerziteta u Sarajevu, Zakona o visokom obrazovanju, kao i drugih akata Ministarstva za obrazovanje i nauku Kantona Sarajevo koja se odnose na dodjelu sredstva za projekte, stipendije i nagrade.

#### **Član 17.**

Ovaj pravilnik stupa na snagu danom donošenja.

***PREDSJEDNIK  
UPRAVNOG ODBORA***

***Prof.dr. Sead Redžepagić, s.r.***

Broj: 02-I-1840/07  
Sarajevo, 03.10.2007. godine